

边裔典

邊裔典第六十五卷

摩竭提部彙考

摩伽陀

摩揭陀

晉

安帝 年釋法顯入西域至摩竭提國 按晉書不載 按釋法顯佛國記從毗舍離國度河

南下一由延到摩竭提國巴連弗邑巴連弗邑是阿育王所治城中王宮殿皆使鬼神作累石起牆闕雕文刻鏤非世所造今故現在阿育王弟得羅漢道常住耆闍崛山志樂閑靜王敬心請於家供養以樂山靜不肯受請王語弟言但受我請當爲汝於城裏作山王乃具飲食召諸鬼神而告之曰明日悉受我請無坐席各自齋來明日諸大鬼神各持大石來辟方四五步坐訖即使鬼神累作大石山又於山底以五大方石作石室可長三丈廣二丈高丈餘有一大乘婆羅門子名羅汰私婆迷住此城裏爽悟多智事無不達以清淨自居國王宗敬師事若往問訊不敢並坐王設以愛敬心執手執手已婆羅門輒自灌洗年可五十餘舉國瞻仰賴此一人弘宣佛法外道不能得加陵衆僧於阿育王塔邊造摩訶衍僧伽藍甚嚴麗亦有小乘寺都合六七百僧衆威儀庠序可觀四方高德沙

門及學問人欲求義理皆詣此寺婆羅門子亦名文殊師利國內大德沙門諸大乘比丘皆宗仰焉亦住此僧伽藍凡諸國中唯此國城邑爲大民人富盛競行仁義年年常以建卯月八日行像作四輪車縛竹作五層有承檣握戟高二丈餘許其狀如塔以白氍纒上然後彩畫作諸天形像以金銀琉璃莊校其上懸繒幡蓋四邊作龕皆有坐佛菩薩立侍可有二十車車莊嚴各異當此日境內道俗皆集作倡伎樂華香供養婆羅門子來請佛佛次第入城入城內再宿通夜然燈伎樂併養國國皆爾其國長者居士各於城中立福德醫藥舍凡國中貧窮孤獨殘跛一切病人皆詣此舍種種供給醫師看病隨宜飲食及湯藥皆令得安差者自去阿育王壞七塔作八萬四千塔最初所作大塔在城南三里餘此塔前有佛腳跡起精舍戶北向塔塔南有一石柱圍丈四五高三丈餘上有銘題云阿育王以閻浮提布施四方僧還以錢贖如是三反塔北三四百步阿育王本于此作泥犁城中央有石柱亦高三丈餘上有師子柱上有銘記作泥犁城因緣及年數日月從此東南行九由延至一小孤石山山頭有石室石室南向佛坐其中天帝釋將天樂般遮彈琴樂佛處帝釋以四十二事問佛一一以指畫石畫跡故在此中亦有僧伽藍從此西南行一由延到那羅聚落是舍利弗本

生村舍利弗還於此村中般泥洹卽此處起塔今亦現在從此西行一由延到王舍新城新城者是阿闍世王所造中有二僧伽藍出城西門三百步阿闍世王得佛一分舍利起塔高大嚴麗出城南四里南向入谷至五山裏五山周圍狀若城郭卽是苾沙王舊城城東西可五六里南北七八里舍利弗目連初見頹鞞處尼犍子作火坑毒飯請佛處阿闍世王酒飲黑象欲害佛處城東北角曲中耆舊耆菴婆羅園中起精舍請佛及千二百五十弟子供養處今故在其城中空荒無人住入谷搏山東南上十五里到耆闍崛山未至頭三里有石窟南向佛本於此坐禪西北三十步復有一石窟阿難於中坐禪天魔波旬化作鵬鷺住窟前恐阿難佛以神足力隔石舒手摩阿難肩怖卽得止鳥跡手孔今悉存故曰鵬鷺窟山窟前有四佛坐處又諸羅漢各各有石窟坐禪處動有數百佛在石室前東西經行調達於山北嶮巖間橫擲其石傷佛足指處石猶存佛說法堂已毀壞止有磚壁基在其山峯秀端巖是五山中最高顯於新城中買香華油燈倩二舊比丘送法顯上耆闍崛山華香供養燃燈續明慨然悲傷收淚而言佛昔於此住說首楞嚴法顯生不值佛但見遺跡處所而已卽於石窟前誦首楞嚴停止一宿還向新城出舊城北行三百餘步道西迦蘭陀竹園精舍今現在衆

僧掃灑精舍北二三里有尸摩賒那尸摩賒那者漢言棄死人墓田搏南山西行三百步有一石室名賓波羅窟佛食後常於此坐禪又西行五六里山北陰中有一石室名車帝佛泥洹後五百阿羅漢結集經處出經時鋪三空座莊嚴校飭舍利弗在左目連在右五百數中少一阿羅漢大迦葉爲上座時阿難在門外不得入其處起塔今亦在搏山亦有諸羅漢坐禪石窟甚多出舊城北東下三里有調達石窟離此五十步有大方黑石昔有比丘在上經行思惟是身無常苦空不得淨觀厭患是身卽捉刀欲自殺復念世尊制戒不得自殺又念雖爾我今但欲殺三毒賊便以刀自刎始傷再得須陀洹旣半得阿那含斷已成阿羅漢果般泥洹從此西行四由延到伽耶城城內亦空荒復南行二十里到菩薩本苦行六年處處有林木從此西行三里到佛入水洗浴天按樹枝得攀出池處又北行二里得彌家女奉佛乳糜處從此北行二里佛於一大樹下石上東向坐食糜樹石今悉在石可廣長六尺高二尺許國中寒暑均調樹木或數千歲乃至萬歲從此東北行半由延到一石窟菩薩入中西向結跏趺坐心念若我成道當有神驗石壁上卽有佛影現長三尺許今猶明亮時天地大動諸天在空中白言此非過去當來諸佛成道處去此西南行減半由延貝多樹下是過去當

來諸佛成道處諸天說是語已卽便在前唱導導引而去菩薩起行離樹三十步天授吉祥草菩薩受之復行十五步五百青雀飛來繞菩薩三匝而去菩薩前到貝多樹下敷吉祥草東向而坐時魔王遣三玉女從北來試魔王自從南來試菩薩以足指按地魔兵退散三女變老自上苦行六年處及此諸處後人皆於中起塔立像今皆在佛成道已七日觀樹受解脫樂處佛於貝多樹下東西經行七日處諸天化作七寶屋供養佛七日處文鱗育龍七日繞佛處佛於尼拘律樹下方石上東向坐梵天來請佛處四天王奉鉢處五百賈客授妙蜜處度迦葉兄弟師徒千人處此諸處亦起塔佛得道處有三僧伽藍皆有僧住衆僧民戶供給饒足無所乏少戒律嚴峻威儀坐起入衆之法佛在世時聖衆所行以至於今佛泥洹已來四大塔處相承不絕四大塔者佛生處得道處轉法輪處般泥洹處阿育王昔作小兒時當道戲遇釋迦佛行乞食小兒歡喜卽以一掬土施佛佛持還泥經行地因此果報作鐵輪王王閻浮提乘鐵輪案行閻浮提見鐵圍兩山間地獄治罪人卽問羣臣此是何等答言是鬼王閻羅治罪人王自念言鬼王尙能作地獄治罪人我是人主何不作地獄治罪人耶卽問臣等誰能爲我作地獄主治罪人者臣答言唯有極惡人能作耳王卽遣臣遍求惡人見泄

水邊有一長壯黑色髮黃眼青以脚鉤魚口呼禽獸禽獸來便射殺無得脫者得此人已將來與王
王密敕之汝作四方高牆內植種種華果并好谷池莊嚴校飾令人渴仰牢作門戶有人入者輒捉
種種治罪莫使得出設使我入亦治罪莫放今拜汝作地獄主有比丘次第乞食入其門獄卒見之
便欲治罪比丘惶怖求請須臾聽我中食俄頃得有人入獄卒內置碓臼中擣之赤沫出比丘見已
思惟此身無常若空如泡如沫卽得阿羅漢旣而獄卒捉內鑊湯中比丘心顏欣悅火滅湯冷中生
蓮花比丘坐上獄卒卽往白王獄中奇怪願王往看王言我前有要今不敢往獄卒言此非小事王
宜疾往更改先要王卽隨入比丘爲說法王得信解卽壞地獄悔前所作衆惡由是信重三寶常至
貝多樹下悔過自責受八齋王夫人問王常遊何處羣臣答言恆在貝多樹下夫人伺王不在時遣
人伐其樹倒王來見之迷悶躒地諸臣以水灑面良久乃蘇王卽以磚累四邊以百甕牛乳灌樹根
身四布地作是誓言若樹不生我終不起誓已樹便卽根上而生以至於今今高減十丈從北南三
里行到一山名鷄足大迦葉今在此山中劈山下入入處不容人下入極遠有旁孔迦葉全身在此
中住孔外有迦葉本洗手土彼方人若頭痛者以此土塗之卽差此山中卽日故有諸羅漢住彼方

諸國道人年年往供養迦葉心濃至者夜卽有羅漢來共言論釋其疑已忽然不現此山榛木茂盛又多師子虎狼不可妄行法顯還向巴連弗邑順恆水西行十二由延到迦尸國波羅捺城

唐

太宗貞觀二十一年摩揭它遣使入貢 按唐書太宗本紀不載 按西域傳摩揭它一曰摩伽它

本中天竺屬國環五千里土沃宜稼穡有異稻巨粒號供大人米王居拘閣揭羅布羅城或曰俱蘇

摩補羅曰波叱釐子城北瀕菴伽河貞觀二十一年始遣使者自通於天子獻波羅樹樹類白楊太

宗遣使取熬糖法卽詔揚州上諸蔗柞藩如其劑色味愈西域遠甚 又東女歷十九種得摩揭陀

按大唐西域記摩揭陀國周五千餘里城少居人邑多編戶地沃壤滋稼穡有異稻種其粒粗大香

味殊越光色特甚彼俗謂之供大人米土地墊濕邑居高原孟夏之後仲秋之前平居流水可以泛

舟風俗淳質氣序溫暑崇重志學尊敬佛法伽藍五十餘所僧徒萬有餘人並多宗習大乘法教天

祠數十異道甚多 菴伽河南有故城周七十餘里苑蕪雖久基址尙在昔者人壽無量歲時號

拘蘇摩補羅城

唐言香華宮城

王宮多華故以名焉逮乎人壽數千歲更名波叱釐子城

舊曰巴連弗邑譌也

初有婆

羅門高才博學門人數千傳以授業諸學徒相從遊觀有一書生徘徊悵望同儕謂曰夫何憂乎曰
盛色方剛羈遊履影歲月已積藝業無成顧此爲言憂心彌劇於是學徒戲言之曰今將爲子求聘
婚親乃假立二人爲男父母二人爲女父母遂坐波吒釐樹謂女婿樹也採時果酌清流陳婚姻之
緒請好合之期時假女父攀華枝以授書生曰斯嘉偶也幸無辭焉書生之心欣然自得日暮言歸
懷戀而止學徒曰前言戲耳幸可同歸林中猛獸恐相殘害書生遂留往來樹側景夕之後異光燭
野管絃清雅帷帳陳列俄見老翁策杖來慰復有一嫗攜引少女並僮從盈路絃服奏樂翁乃指少
女曰此君之弱室也酣歌樂讌經七日焉學徒疑爲獸害往而求之乃見獨坐樹陰若對上客告與
同歸辭不從命後自入城拜謁親故說其始末聞者驚駭與諸友人同往林中咸見華樹是一大第
僮僕役使驅馳往來而彼老翁從容接對陳饌奏樂賓主禮備諸友還城具告遠近暮歲之後生一
子男謂其妻曰吾今欲歸未忍離阻適復留止棲寄飄露其妻既聞具以白父翁謂書生曰人生行
樂詎必故鄉今將築室宜無異志於是役使之徒功成不日香華舊城遷都此邑由彼子故神爲築
城自爾之後國名波吒釐子城焉

王故宮北有石柱高數十尺是無憂王作地獄處釋迦如來

涅槃之後第一百有阿輪迦

唐言無憂舊曰阿育王謚也

王者頻毗娑羅

唐言影堅舊曰頻婆娑羅謚也

王之曾孫也自王舍

城遷都波吒釐重築外郭周於故城年代浸遠唯餘故基伽藍天祠及窣堵波餘址數百在者二三

唯故宮北臨苑伽河小城中有千餘家初無憂王嗣位之後舉措苛暴乃立地獄作害生靈周垣峻

峙隅樓特起猛焰洪鑪銛鋒利刃備諸苦具擬像幽塗招募凶人立爲獄主初以國中犯法罪人不

校輕重總入塗炭後以行經獄次擒以誅戮至者皆死遂緘口焉時有沙門初入法衆廵里乞食遇

至獄門獄吏凶人擒欲殘害沙門惶怖請得禮懺俄見一人縛來入獄斬截手足磔裂形骸俯仰之

間肢體糜散沙門見已深增悲悼成無常觀證無學果獄卒曰可以死矣沙門既證聖果心夷生死

雖入鑊湯若在清池有大蓮花而爲之座獄主驚駭馳使白王王遂躬觀深讚靈祐獄主曰大王當

死王曰云何對曰王先垂命令監刑獄凡至獄垣皆從殺害不云王入而獨免死王曰法已一定理

無再變我先垂令豈除汝身汝久濫生我之咎也卽命獄卒投之洪鑪獄主既死王乃得出於是頻

牆堙壅廢獄寬刑

地獄南不遠有窣堵波基址傾陷唯餘覆鉢之勢寶爲之飾石作欄檻卽之

萬四千之一也無憂王以人功建於宮中中有如來舍利一升靈鑒間起神光時燭無憂王廢獄八

後遇近護大阿羅漢方便善誘隨機導化王謂羅漢曰幸以宿福位據人尊慨茲障累不遭佛化今者如來遺身舍利欲重修建諸窣堵波羅漢曰大王以福德力役使百靈以弘誓心匡護三寶是所願也今其時矣因爲廣說獻土之因如來懸記興建之功無憂王聞已慶悅召集鬼神而令之曰法王導利舍靈有慶我資宿善尊極人中如來遺身重修供養今爾鬼神戮力同心境極贍部戶滿拘胝以佛舍利起窣堵波心發於我功成於汝勝福之利非欲獨有宜各營構待後告命鬼神受旨在所興功功既成已咸來請命無憂王既開八國所建諸窣堵波分其舍利付鬼神已謂羅漢曰我心所欲諸處同時藏下舍利心雖冀此事未從欲羅漢曰王命鬼神至所期日日有隱蔽其狀如手此時也宜下舍利王承此旨宣告鬼神逮乎期日無憂王觀候光景日正中時羅漢以神通力伸手蔽日營建之所咸皆瞻仰同於此時功績咸畢 窣堵波側不遠精舍中有大石如來所履雙迹猶存其長尺有八寸廣餘六寸左右迹俱有輪相十指皆帶華文魚形映起光明時照昔者如來將取寂滅北趨拘尸那城南顧摩揭陀國蹈此石上告阿難曰吾今最後留此足迹將入寂滅顧摩揭陀也百歲之後有無憂王命世建都君臨此地匡護三寶役使百神及無憂王之嗣位也遷都築邑掩

周迹石既近宮城恆親供養後諸國王競欲舉歸石雖不大衆莫能轉近者設賞迦王毀壞佛法遂
卽石所欲滅聖迹鑿已還平文彩如故於是捐棄苑伽河流尋復本處其側窄堵波卽過去四佛座
及經行遺迹之所佛迹精舍側不遠有大石柱高三十餘尺書記殘缺其大略曰無憂王信根貞固
三以瞻部洲施佛法僧三以諸珍寶重自酬贖其辭云云大略斯在故宮北有大石室外若崇山內
廣數丈是無憂王爲出家弟役使神鬼之所建也初無憂王有同母弟名摩醯因陀羅唐言生自貴
大帝族服僭王制奢侈縱暴衆庶懷怨國輔老臣進諫王曰驕弟作威亦以太甚夫政平則國治人和則
主安古之明訓由來久矣願存國典收付執法無憂王泣謂弟曰吾承基緒覆燾生靈况爾同胞豈
忘惠愛不先匡導已陷刑法上懼先靈下迫衆議摩醯因陀羅稽首謝曰不自謹行敢干國憲願賜
再生更寬七日於是置諸幽室嚴加守衛珍羞上饌進奉無虧守者唱曰已過一日餘有六日至第
六日已旣深憂懼更勵身心便獲果證昇虛空示神迹尋出塵俗遠棲巖谷無憂王躬往謂曰昔拘
國制欲致鬯刑豈意清昇取證聖果旣無滯累可以還國弟曰昔羈愛網心馳聲色今出危城志悅
山谷願棄人間長從丘壑王曰欲靜心慮豈必幽巖吾從爾志當爲崇樹遂召命鬼神而告之曰吾

於後日廣備珍羞爾曹相率來集我會各持大石自爲牀座諸神受命至期畢萃衆會旣已王告神曰石座縱橫宜自積聚因功不勞豐爲虛室諸神受命不日而成無憂王躬往迎請止此山廬故宮北地獄南有大石槽是無憂王匠役神功作爲此器飯僧之時以儲食也 故宮西南有小石山

周巖谷間數十石室無憂王爲近護等諸阿羅漢役使鬼神之所建立傍有故臺餘基積石池沼漣漪清瀾澄鑒鄰國遠人謂之聖水若有飲濯罪垢消滅 山西南有五窰堵波崇基已陷餘址尙

高遠而望之鬱若山阜面各數百步後人於上重更修建小窰堵波印度記曰昔無憂王建八萬四千窰堵波已尙餘五升舍利故別崇建五窰堵波製奇諸處靈異間起以表如來五分法身薄信之徒竊相評議云是昔者難陀王建此五藏以儲七寶其後有王不甚淳信聞先疑議肆其貪求興動軍師躬臨發掘地震山傾雲昏日翳窰堵波中大聲雷震士卒僵仆象馬驚奔自茲已降無敢覬覦或曰衆議雖多未爲確論循古所記信得其寶 故城東南有屈吒阿濫摩

唐言

雞園僧伽藍無憂王

之所建也無憂王初信佛法也式遵崇建修植善種召集千僧凡聖兩衆四事供養什物周給頽毀已久基址尙存伽藍側有大窰堵波名阿摩落迦阿摩落迦者印度藥果之名也無憂王遭疾彌留

知命不濟欲捨珍寶崇樹福田權臣執政誠勿從欲其後因食留阿摩落果玩之半爛握果長息問諸臣曰瞻部洲主今是何人諸臣對曰唯獨大王王曰不然我今非主唯此半果而得自在嗟乎世間富貴危甚風燭位據區宇名高稱謂臨終匱乏見逼強臣天下非已半果斯在乃命侍臣而告之曰持此半果詣彼雞園施諸衆僧作如是說昔一瞻部洲主今半阿摩落王稽首大德僧前願受最後之施凡諸所有皆已喪失唯斯半果得少自在哀愍貧乏增長福種僧中上座作如是言無憂大王宿期弘濟瘡疾在躬姦臣擅命積寶非已半果爲施承王來命普施衆僧卽召典事藥中總煮收其果核起窰堵波旣荷厚恩遂旌顧命阿摩落窰堵波西北故伽藍中有窰堵波謂建毼椎聲初此城內伽藍百數僧徒肅穆學業清高外道學人銷聲緘口後僧徒相次殂落而諸後進莫繼前修外道師資傳訓成藝於是命僞召侶于計萬數來集僧坊揚言唱曰大擊毼椎招集學人羣愚同止謬有扣擊遂白王請校優劣外道諸師高才達學僧徒雖衆辭論庸淺外道曰我論勝自今已後諸僧伽藍不得擊毼椎以集衆也王允其請依先論制僧徒受恥忍詬而退十二年間不擊毼椎時南印度那伽闕刺樹那菩薩

唐言龍猛舊譯曰龍樹非也

幼傳雅譽長擅高名捨離欲愛出家修學深究妙理位登

初地有大弟子提婆者智慧明敏機神警悟白其師曰波吒釐城諸學人等辭屈外道不擊犍椎日月驟移十二年矣敢欲摧邪見山然正法炬龍猛曰波吒釐城外道博學爾非其儔吾今行矣提婆曰欲摧腐草詎必傾山敢承指誨黜諸異學大師立外道義而我隨文破析詳其優劣然後圖行龍猛乃扶立外義提婆隨破其理七日之後龍猛失宗已而嘆曰謬辭易失衰義難扶爾其行矣摧彼畢矣提婆菩薩夙擅高名波吒釐城外道聞之也卽相召集馳白王曰大王昔紆聽覽制諸沙門不擊犍椎願垂告命令諸門候鄰境異僧勿使入城恐相黨援輕改先制王允其言嚴加伺候提婆既至不得入城聞其制令便易衣服卷疊袈裟置草束中褰裳疾驅負戴而入既至城中棄草披衣至此伽藍欲求止息知人旣寡莫有相舍遂宿犍椎臺上於晨朝時便大振擊衆聞伺察乃昨客遊茲芻諸僧伽藍傳聲響應王聞究問莫得其先至此伽藍咸推提婆提婆曰夫犍椎者擊以集衆有而不用懸之何爲王人報曰先時僧衆論議墮負制之不擊已十二年提婆曰有是乎吾於今日重聲法鼓使報王曰有異沙門欲雪前恥王乃召集學人而定制曰論失本宗殺身以謝於是外道競陳旗鼓誼談異義各曜辭鋒提婆菩薩旣昇論座聽其先說隨義析破曾不浹辰摧諸異道國王大臣

莫不慶悅建此靈基以旌至德

建擊鍵椎宰堵波北有故基昔鬼辯婆羅門所居處也初此城

中有婆羅門葺宇荒蕪不交世路祠鬼求福魍魎相依高論劇談雅辭響應人或激難垂帷已對舊

學高才無出其右士庶翕然仰之猶聖有阿濕縛窣沙

唐言馬鳴

菩薩者智周萬物道播三乘每謂人曰

此婆羅門學不師受藝無稽古屏居幽寂獨擅高名將非神鬼相依妖魅所附何能若是者乎夫辯

資鬼授言不對人辭說一聞莫能再述吾今往彼觀其舉措遂造其廬而謂之曰仰欽盛德爲日已

久幸願褰帷敢伸宿志而婆羅門居然簡傲垂帷以對終不面談馬鳴心知鬼魅情甚自負辭畢而

退謂諸人曰吾已知之摧彼必矣尋往白王唯願垂許與彼居士較論劇談王聞駭曰斯何人哉若

不證三明具六通何能與彼論乎命駕躬臨詳鑒辯論是時馬鳴論三藏微言述五明大義妙辯縱

橫高論清遠而婆羅門既述辭已馬鳴重曰失吾旨矣宜重述之時婆羅門默然杜口馬鳴叱曰何

不釋難所事鬼魅宜速授辭疾褰其帷視占其怪婆羅門惶遽而曰止止馬鳴退而言曰此子今晨

聲聞失墜虛名非久斯之謂也王曰非夫盛德誰鑒左道知人之哲絕後光前國有常典宜旌茂實

城西南隅二百餘里有伽藍餘址其傍有宰堵波神光時燭靈瑞間發近遠衆庶莫不祈請是過去

四佛座及經行遺迹之所

故伽藍西南行百餘里至鞞羅釋迦伽藍庭宇四院觀閣三層崇臺

累仞重門洞啟頻毗娑羅王末孫之所建也旌召高才廣延俊德異域學人遠方髦彥同類相趨肩隨戾止僧徒千數並學大乘中門當塗有三精舍上置輪相鈴鐸虛懸下建層基軒檻周列戶牖棟梁墀垣階陛金銅隱起厠間莊嚴中精舍佛立像高三丈左多羅菩薩像右觀自在菩薩像凡斯三像鍤石鑄成威神肅然冥鑒遠矣精舍中各有舍利一升靈光或照奇瑞間起鞞羅釋迦伽藍西南九十餘里至大山雲石幽蔚靈仙攸舍毒蛇暴龍窟穴其藪猛獸鷲鳥棲伏其林山頂有大磐石上建窰堵波其高十餘尺是佛入定處也昔者如來降神止此坐斯磐石入滅盡定時經宿焉諸天靈聖供養如來鼓天樂雨天華如來出定諸天感慕以寶金銀起窰堵波去聖逾邈寶變爲石自古迄今人未有至遙望高山乃見異類長蛇猛獸羣從右旋天仙靈聖層隨讚禮

山東岡有窰堵波

在昔如來佇觀摩揭陀國所履之處也山西北三十餘里山阿有伽藍負嶺崇基疏崖峙閣僧徒五

十餘人並習大乘法教瞿那末底

唐言德慈

菩薩伏外道之處初此山中有外道摩沓婆者祖僧佉之法

而習道焉學窮內外言極空有名高前烈德重當時君王珍敬謂之國寶臣庶宗仰咸曰家師鄰國